

Na osnovu člana 16. stav 4. Zakona o Vladi Zeničko-dobojskog kantona-Prečišćen tekst ("Službene novine Zeničko-dobojskog kantona", broj: 7/10), na prijedlog Ministarstva za rad, socijalnu politiku i izbjeglice Zeničko-dobojskog kantona, Vlada Zeničko-dobojskog kantona, na sjednici 74. sjednici, održanoj 09.08.2012. godine, d o n o s i

ZAKLJUČAK

I

Prihvata se Dopuna mišljenja Ministarstva za rad, socijalnu politiku i izbjeglice Zeničko-dobojskog kantona, broj: 09-02-1942-2/12 od 27.07.2012. godine, u pogledu dopune autentičnog tumačenja odredbe člana 121. stav (3) Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07 i 13/11- u daljem tekstu: Zakon).

II

Utvrđuje se da data dopuna mišljena iz tačke I ovog zaključka čini sastavni dio Prijedloga Autentičnog tumačenja odredaba člana 120. stav (1) i (2) i člana 121. stav (1) i (3) Zakona.

III

Prijedlog Autentičnog tumačenja odredaba člana 120. stav (1) i (2) i člana 121. stav (1) i (3) Zakona upućuje se u dalju skupštinsku proceduru.

IV

Zaključak stupa na snagu danom donošenja.

Broj: 02-_____ /12.

Datum, 09.08.2012. godine

Z e n i c a

PREMIJER

mr.sci.Fikret Plevljak dipl.ing.

DOSTAVLJENO:

1x Ministarstvo za rad, socijalnu politiku i izbjeglice,

1x Stručna služba Skupštine,

1x a/a

Na osnovu člana 158. stav 2. Poslovnika o radu Skupštine Zeničko-dobojskog kantona-Prečišćeni tekst (“Službene novine Zeničko-dobojskog kantona”, broj: 12/09,19/09 i 5/10-isp.), Skupštine Zeničko-dobojskog kantona na _____sjednici održanoj _____2012. godine, d o n o s i

AUTENTIČNO TUMAČENJE

odredaba člana 120. stav (1) i (2) i člana 121. stav (1) i (3)
Zakona o socijalnoj zaštiti, zaštiti civilnih žrtava rata i zaštiti porodice sa djecom
(„Sl. novine Zeničko-dobojskog kantona“, broj: 13/07 i 13/11).

Član 1.

(Predmet autentičnog tumačenja)

Utvrđuje se autentično tumačenje odredaba člana 120. stav (1) i (2) i člana 121. stav (1) i (3) Zakona o socijalnoj zaštiti, zaštiti civilnih žrtava rata i zaštiti porodice sa djecom („Sl. novine Zeničko-dobojskog kantona“, broj: 13/07 i 13/11- u daljem tekstu : Zakon), a kojim se precizira pravilan smisao navedenih odredbi Zakona.

Član 2.

(Pravilan smisao odredbi Zakona)

Odredbe Zakona glase:

„Član 120.

(1) Naknada umjesto plaće ženi-majci u radnom odnosu za vrijeme dok odsustvuje sa posla radi trudnoće, porođaja i njege djeteta (u daljem tekstu: naknada plaće) isplaćuje se za vrijeme korištenja porodiljskog odsustva.

(2) Osnovicu za naknadu plaće predstavlja prosječna plaća koju je žena-zaposlenik ostvarila u periodu od 6 mjeseci, prije početka korištenja odsustva zbog porođaja.

Član 121.

(1) Naknada plaće utvrđuje se u visini iznosa od 80% od osnovice za naknadu plaće iz člana 120. stav (2) ovog zakona.

(3) Ukoliko žena-majka u periodu od šest mjeseci prije porođaja nije primila ili nije redovno primala plaću, naknada plaće, iz stava (1) ovog člana, ne može biti manja od 200 KM.“

S obzirom na citirane zakonske odredbe, osnovicu za utvrđivanje visine naknade plaće predstavlja zbir plaća ostvarenih u periodu od 6 mjeseci prije početka korištenja porodiljskog odsustva podijeljen na 6, kako bi se dobila prosječna plaća, od čega 80% predstavlja visinu naknade plaće koja pripada ženi majci u radnom odnosu, za vrijeme dok odsustvuje sa posla.

U situaciji kad zaposlenica u periodu od 6 mjeseci prije početka korištenja porodiljskog odsustva nije primala plaću za svih 6 mjeseci, ostvaruje pravo na naknadu plaće za vrijeme porodiljskog odsustva, uz ispunjavanje ostalih Zakonom propisanih uslova, ali ta naknada ne može biti manja od 200,00 KM mjesečno.

Prema tome, u situaciji kada je zaposlenica ostvarila plaću za 3 mjeseca u periodu od 6 mjeseci prije početka korištenja porodiljskog odsustva – iznosi sve 3 primljene plaće sabiraju se i dijele na 6, što predstavlja osnovicu za utvrđivanje visine naknade, od čega 80% pripada zaposlenici kao naknada plaće, s tim da ta naknada ne može biti manja od 200,00 KM mjesečno.

Tumačenjem odredbe stava (2) člana 120. Zakona, kojom je propisano da osnovicu za naknadu plaće predstavlja prosječna plaća koju je žena-zaposlenik ostvarila u periodu od 6 mjeseci

prije početka korištenja odsustva zbog porođaja, izvodi se zaključak da je za ispunjenje uslova za ostvarivanje prava na naknadu plaće za vrijeme korištenja porodiljskog odsustva upravo trajanje radnog odnosa 6 mjeseci prije početka korištenja odsustva zbog porođaja.

Član 3.
(Primjena autentičnog tumačenja)

Ovo autentično tumačenje se primjenjuje i važi do dana primjene odredaba Zakona za koje se daje autentično tumačenje i isto će se objaviti u „Službenim novinama Zeničko-dobojskog kantona“.

Broj: _____/12

Datum, _____, 2012. godine

Z e n i c a

PREDSJEDAVAJUĆI

Sretko Radišić